

Undi 18: RUU lulus, Ahli Parlimen beri sokongan majoriti lebih dua pertiga
Astro Awani
16 Julai 2019
Firdaus Azil,

KUALA LUMPUR: Barisan Ahli Parlimen Kerajaan dan Blok Pembangkang mencipta sejarah apabila memberi sokongan majoriti lebih dua pertiga bagi meluluskan Rang Undang-undang (Pindaan) 2019, di Dewan Rakyat, hari ini.

Speaker Datuk Mohamad Ariff Md Yusof ketika mengumumkan perkara itu berkata, seramai 211 ahli menyokong, melebihi jumlah yang diperlukan iaitu 148 orang.

RUU itu, yang dibentangkan Perdana Menteri Tun Dr Mahathir Mohamad pada bacaan kali kedua awal hari ini, bercadang meminda perenggan (b) Perkara 47 Perlembagaan Persekutuan untuk menurunkan umur warganegara yang layak untuk menjadi ahli Dewan Rakyat daripada 21 kepada 18 tahun.

Ia juga bertujuan meminda perenggan (a) Fasal 1 Perkara 119 Perlembagaan Persekutuan untuk menurunkan umur seseorang warganegara yang layak untuk mengundi daripada 21 kepada 18 tahun.

Selain itu, RUU itu juga mengandungi cadangan untuk pendaftaran warganegara secara automatik sejourus mereka mencapai umur 18 tahun.

Terdahulu, sewaktu menggulung RUU berkenaan, Dr Mahathir menjawab isu yang dibangkitkan sewaktu perbahasan yang melibatkan 59 orang Ahli Parlimen.

Antaranya, Ketua Pembangkang Datuk Seri Ismail Sabri Yaakob (BN-Bera) ingin mengetahui sama ada 3.9 juta pengundi yang telah melepasi umur 21 pada pilihan raya umum yang lepas, tetapi masih belum mengundi, akan turut didaftarkan secara automatik.

Perdana Menteri berkata, cadangan pendaftaran pemilih secara automatik akan turut meliputi 3.9 juta warganegara Malaysia berumur 21 tahun berkenaan, dan akan diberi keutamaan oleh SPR dalam pelaksanaan pendaftaran pemilih ini.

Berhubung cadangan Datuk Seri Ahmad Maslan (BN-Pontian) yang ingin mengetahui sekiranya kerajaan bercadang mewajibkan pengundi berkelayakan keluar mengundi bagi meningkatkan peratusan keluar mengundi, Dr Mahathir berkata, belum ada keperluan berbuat demikian.

“Kajian awal terhadap negara-negara yang telah mewajibkan pengundinya keluar mengundi juga tidak 10 mendapat 100 peratus keluar mengundi. Singapura mencapai 93.56 peratus, Australia 91.89 peratus diikuti oleh Belgium 88.3 peratus dan Austria 80 peratus.

“Kerajaan akan meningkatkan usaha untuk memberi kesedaran kepada warganegara yang layak untuk keluar mengundi,” katanya.

Dalam pada itu, Perdana Menteri berkata, tempoh pelaksanaan RUU ini perlu diberi pertimbangan sewajarnya kerana ianya akan menentukan hala tuju demokrasi negara.

“Penelitian kepada pelaksanaan ini adalah wajar bagi mengambil kira segenap aspek kebajikan bakal-bakal pengundi diberi keutamaan dan bukannya untuk memberi ruang kepada apa-apa agenda politik.

“Agensi-agensi pelaksana yang terlibat secara langsung sewajarnya diberi peluang dan ruang untuk membuat persediaan teratur, umpamanya dari segi integrasi data antara Jabatan Pendaftaran Negara, Jabatan Penjara Malaysia, Kementerian Kesihatan Malaysia, Polis Diraja Malaysia, Angkatan Tentera Malaysia dan lain-lain agensi berkaitan,” katanya lagi.

© 2019 Astro Awani Network Sdn. Bhd.

(535275-D) All Rights Reserved.

Source: <http://www.astroawani.com/berita-malaysia/undi-18-ruu-lulus-ahli-parlimen-beri-sokongan-majoriti-lebih-dua-pertiga-212815>